

## Lerond

I.

Quant li estez et la douce saisons  
font foille et flour et les prés raverdir,  
et li douz chanz des menus oiseillons  
fait as plusours de joie souvenir;  
las, chascuns chante et je plour et soupir,  
et si n'est pas droiture ne raisons;  
ainz est adés toute m'ententions,  
dame, de vous honourer et servir.

II.

Se j'avoie le sens qu'ot Salemons,  
si me feroit amours pour fol tenir;  
quar tant est fors et crueuz sa prisons  
(qu'ele me fait assaier et sentir)!  
bien me deüst espasser et garir,  
et enseignier quelle est ma guerisons,  
car j'ai servi lonc tans et en pardons,  
et servirai adés sans repantir.

III.

Mout m'esmerveill quele est li ochoissons,  
qu ele me fait si longuement languir:  
je sai mout bien qu'ele croit les felons,  
les losengiers (que Diex puist maleïr!);  
toute lor painne ont mise en moi trahir,  
maiz ne lor vaut lor morteuz trahisons,  
quant il savront queus iert li guerredons,  
dame, de vous, cui ainc ne seu mentir.

IV.

Ainc ne la seu losengier ne flater  
(ne ja Diex sens ne m'en doint ne talent!),  
maiz ma dame servir et honourer  
et faire adés a son commandement;  
et sachiez bien (se biauz servirs ne ment,  
ou li miens cuers, qui bien me puet grever)  
que touz les biens c'on puet avoir d'amer  
avra mes cuers, qui adés s'i atent.

V.

Se vous daigniez ma proiere escouter,  
douce dame, je vous proi et demant

que vous pensés de moi guerredoner;  
je penserai de bien servir avant.  
De tous les maus ke j'ai ne m'est noiant,  
douce dame, se me volés amer:  
em poi de tans poés guerredoner  
les biens d'amors ke j'ai atendus tant.

- letto 708 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropaea.let.uniroma1.it/?q=laboratorio/lerond-15>